

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 421112 22 23 St 2
Datum: 13.05.2024. godine

Općinski sud u Tuzli, stečajni sudija Vedran Milašinović, u stečajnom postupku nad imovinom „TOOL PRECISION“ d.o.o. Gradačac, ul. 25 novembra bb, donio je dana 13.05.2024. godine sljedeće

RJEŠENJE

POZIVAJU SE stečajni dužnik kao predlagač, povjerioci i sva zainteresovana lica da u roku od 30 (trideset) dana od dana objave ovog rješenja u „Službenim novinama FBiH“, predlože otvaranje stečajnog postupka i na žiro-račun Suda, broj: 132-100-03091233-91 NLB banka d.d. Sarajevo, predujme iznos od 7.147,10 KM (sedamhiljadastotinučetdesetsedamkonvertibilnihmaraka i 10/100 pfeniga), na ime troškova stečajnog postupka.

Ukoliko niko od pozvanih iz stava 1 ovog rješenja ne predloži otvaranje stečajnog postupka i ne uplati navedeni iznos predujma u ostavljenom roku, sud će o prijedlogu za otvaranje stečajnog postupka odlučiti u skladu sa odredbama Zakona o stečajnom postupku.

Ovo rješenje bit će objavljeno u “Službenim novinama F BiH”, Oglasnoj ploči ovog suda i Web stranici suda-elektronskoj tabli suda.

Obrazloženje

Predlagač je dana 16.03.2022. godine podnio prijedlog za pokretanje stečajnog postupka nad stečajnim dužnikom „TOOL PRECISION“ d.o.o. Gradačac, ul. 25 novembra bb. Dana 18.04.2022. godine pokrenut je prethodni postupak radi utvrđivanja uslova za otvaranje stečajnog postupka nad imovinom privrednog društva „TOOL PRECISION“ d.o.o. Gradačac, ul. 25 novembra bb, a za privremenog stečajnog upravnika imenovan je Almir Bajrić iz Tuzle.

Nakon dostavljanja izvještaja privremenog stečajnog upravnika i održanog ročišta, sud je rješenjem od 12.07.2022. godine objavio javni oglas kojim je pozvao sva zainteresovana lica da u roku od 30 dana predujme troškove otvaranja i vođenja stečajnog postupka, a nakon što je rok protekao bez uplate predujma troškova, sud je rješenjem od 09.09.2022. godine otvorio i istovremeno zaključio stečajni postupak.

Odlučujući o izjavljenim žalbama povjerioca protiv rješenja od 09.09.2022. godine, Kantonalni sud u Tuzli je rješenjem broj: 32 0 St 421112 22 Pž od 15.02.2023. godine ukinuo rješenje od 09.09.2022. godine, te predmet vratio na ponovni postupak, sa uputom da je potrebno izvršiti procjenu zatečene imovine stečajnog dužnika (dvije mašine marke ChironFz i ostalih pokretnih stvari).

Postupajući u ponovnom postupku, u skladu sa uputama Kantonalnog suda, sud je angažovao vještaka procjenitelja koji je izvršio procjenu vrijednosti pomenutih pokretnih stvari o čemu je sačinio nalaz i mišljenje od 15.01.2024. godine.

Iz izvještaja privremenog stečajnog upravnika proizilazi da obaveze društva prema podacima iz posljednjeg finansijskog izvještaja predatog FIA iznose 1.036.481,00 KM (od čega je iznos dugoročnih obaveza 109.466 KM a odnosi se na dugoročne kredite društva, dok je udio kratkoročnih obaveza u iznosu od 927.015 KM razvrstan na obaveze za kratkoročne kredite i ostale kratkoročne obaveze u iznosu od 127.472 KM, obaveze prema dobavljačima u zemlji u iznosu od 218.546 KM, dobavljačima u inostranstvu iznos od 497.547 KM, dobavljači povezana pravna lica u iznosu od 13.897 KM, obaveze po osnovu plaća i naknada plaća iznos od 20.579 KM, primljeni avansi u iznosu od 6.847

KM, obaveze za PDV u iznosu od 35.889 KM, te ostale obaveze u iznosu od 6.238 KM), s tim da bi definitivnu visinu stvarnih obaveza bilo moguće utvrditi samo ukoliko se otvori stečajni postupak a na osnovu prijavljenih potraživanja. Društvo u svom vlasništvu nema nepokretnosti niti novčanih sredstava, računi društva su blokirani konstantno od mjeseca novembra 2021. godine.

Društvo u vlasništvu ima pokretnu imovinu, čiju je vrijednost ovlašteni procjenitelj Nihad Jusufović iz Tuzle procjenio na ukupan iznos od 6.284,90 KM, i to vrijednost mašina Chiron FZ u iznosu od 6.143,00 KM (jedna mašina 4.212,00 KM, a druga 1.931,00 KM), oprema u iznosu od 91,00 KM, gotovi proizvodi 9,12 KM i materijal (šipkasti materijal) 41,78 KM. Po ocjeni suda ovlašteni procjenitelj je u svom nalazu i mišljenju naveo opis i stanje pokretnih stvari, obrazložio primjenjenu metodu procjene, te iskazao procjenjene vrijednosti stvari, pa kako na nalaz i mišljenje nije bilo prigovora niti primjedbi sud smatra da isti daje dovoljan osnov za procjenu vrijednosti pomenute imovine.

Nakon što je ovlašteni procjenitelj dostavio procjenu vrijednosti imovine stečajnog dužnika, privremeni stečajni upravnik je u spis suda dana 07.02.2024. godine dostavio projekciju predviđenih troškova stečajnog postupka sa specifikacijom istih, u kojoj je naveo da bi prema procjeni minimalni troškovi otvaranja i vođenja stečajnog postupka iznosili 14.932,00 KM (knjigovodstvene usluge 2.000,00 KM, takse FIA za predaju finansijskih izvještaja 180,00 KM, takse PDV registracija izmjena, deregistracija brisanje 60,00 KM, zakup za mašine, alate i gp. 2.000,00 KM, troškovi komisije za prodaju 400,00 KM, bankarske provizije 250,00 KM, izrada pečata, ptt troškovi, kanc. troškovi, ovjere 200,00 KM, nagrada za rad stečajnog upravnika (bruto) za 3 mjeseca 5.892,00 KM, naknada troškova stečajnog upravnika 300,00 KM, troškovi uređenja i smještaja arhivske građe shodno Zakonu o arhivskoj građi 3.000,00 KM), pa kako bi od uplaćenih troškova za prethodni postupak nakon isplate vještaku preostalo 1.500,00 KM, te pod pretpostavkom da se stvari uspiju prodati za procjenjeni iznos 6.284,90 KM, to bi bilo potrebno predujmiti preostali iznos od 7.147,10 KM (14.932,00- 1.500,00- 6.284,90=7.147,10) za otvaranje i vođenje stečajnog postupka.

Društvo HIGH-TECH Koncept d.o.o. Srebrenik je u žalbi izjavljenoj protiv rješenja od 09.09.2022. godine između ostalog navelo da je Općinski sud u Gradačcu na prijedlog navedenog društva kao tražioca izvršenja donio rješenje o izvršenju kojim je dozvolio izvršenje na pokretnim stvarima „TOOL PRECISION“ d.o.o. Gradačac, kao izvršenika, shodno čemu isti ostvaruje razlučno pravo na navedenim stvarima (mašinama Chiron FZ).

Odredbom člana 97 stav 2 Zakona o stečaju je propisano ko su razlučni povjerioci, te je alinejom b) propisano da su to povjerioci koji su zakonom, pljenidbom, sporazumom pred sudom ili pravnim poslom stekli neko založno pravo.

Iz rješenja o izvršenju Općinskog suda u Gradačcu broj: 28 0 Ip 077113 21 Ip od 27.10.2021. godine proizilazi da je određeno izvršenje na novčanim sredstvima na računu, a u slučaju da se ne bude mogla izvršiti pljenidba novčanih sredstava da se određuje izvršenje na pokretnim stvarima.

Odredbom člana 124 stav 1 Zakona o izvršnom postupku je propisano da tražilac izvršenja stiče pljenidbenim popisom založno pravo na popisanim pokretnim stvarima. Dakle, založno pravo na pokretnim stvarima se ne stiče samim donošenjem rješenja o izvršenju kojim se određuje izvršenje, već tek kada sudski izvršitelj izvrši popis i pljenidbu pokretnih stvari.

S obzirom da navedeni povjerilac nije dostavio dokaz da su u izvršnom postupku provedeni popis i pljenidba pokretnih stvari, stanje u spisu za sada ne daje osnov za zaključak da povjerilac ima razlučno pravo na istima.

Sud ukazuje da navedenu ocjenu daje isključivo radi daljeg postupanja u ovom postupku, a shodno uputama Kantonalnog suda Tuzla iz ukidnog rješenja od 15.02.2023. godine (posljednji pasus obrazloženja), a da bi definitivnu ocjenu postojanja razlučnog prava dao stečajni upravnik ukoliko bi stečajni postupak bio otvoren, te ukoliko bi bilo prijavljeno potraživanje sa zahtjevom za priznanje razlučnog prava od strane povjerioca.

Dakle, imajući u vidu sve navedeno, sud je utvrdio da je prijedlog za otvaranje stečajnog postupka dopušten jer je podnesen od strane zakonom ovlaštenog predlagача i osnovan s obzirom da je stečajni dužnik platežno nesposoban.

Takođe, s obzirom da stečajni dužnik nema imovine koja bi bila dovoljna za pokriće minimalnih troškova otvaranja i vođenja stečajnog postupka, sud je u smislu odredbe člana 102 stav 7 Zakona o stečaju pozvao dužnika, povjerioce i sva zainteresovana lica da izvrše uplatu troškova finansiranja stečajnog postupka u visini od 7.147,10 KM (sa specifikacijom koja je dana u ranijem dijelu obrazloženja), pri čemu je uobzirio sredstva preostala iz predujma za vođenje prethodnog postupka kao i procjenjenu vrijednost imovine.

Ukoliko predlagač, povjerioci ili neko od zainteresovanih lica u ostavljenom roku ne predlože otvaranje stečajnog postupka i izvrše uplatu predujma troškova za vođenje stečajnog postupka, sud će otvoriti stečajni postupak i odmah ga zaključiti u skladu sa odredbama člana 102 stav 8 Zakona o stečaju.

Odluka o dostavi rješenja i javnom oglašavanju putem oglasne ploče suda, WEB stranice Općinskog suda u Tuzli i javnog objavljivanja u Sl. Novina F BiH, zasniva se na odredbi člana 102 stav 7 Zakona o stečaju.

Stečajni sudija
Vedran Milašinović

POUKA O PRAVNOM LIJEKU: Protiv ovog rješenja nije dozvoljena žalba.